

Franckesche Stiftungen zu Halle

Eine Heer-||predigt widder|| den Türcken.|| Mart. Luther.||

Luther, Martin

Wittenberg, 1529

Eine Heerpredigt widder den Türcken

Nutzungsbedingungen

Die Digitalisate des Francke-Portals sind urheberrechtlich geschützt. Sie dürfen für wissenschaftliche und private Zwecke heruntergeladen und ausgedruckt werden. Vorhandene Herkunftsbezeichnungen dürfen dabei nicht entfernt werden.

Eine kommerzielle oder institutionelle Nutzung oder Veröffentlichung dieser Inhalte ist ohne vorheriges schriftliches Einverständnis des Studienzentrums August Hermann Francke der Franckeschen Stiftungen nicht gestattet, das ggf. auf weitere Institutionen als Rechteinhaber verweist. Für die Veröffentlichung der Digitalisate können gemäß der Gebührenordnung der Franckeschen Stiftungen Entgelte erhoben werden.

Zur Erteilung einer Veröffentlichungsgenehmigung wenden Sie sich bitte an die Leiterin des Studienzentrums, Frau Dr. Britta Klosterberg, Franckeplatz 1, Haus 22-24, 06110 Halle (studienzentrum@francke-halle.de)

Terms of use

All digital documents of the Francke-Portal are protected by copyright. They may be downloaded and printed only for non-commercial educational, research and private purposes. Attached provenance marks may not be removed.

Commercial or institutional use or publication of these digital documents in printed or digital form is not allowed without obtaining prior written permission by the Study Center August Hermann Francke of the Francke Foundations which can refer to other institutions as right holders. If digital documents are published, the Study Center is entitled to charge a fee in accordance with the scale of charges of the Francke Foundations.

For reproduction requests and permissions, please contact the head of the Study Center, Frau Dr. Britta Klosterberg, Franckeplatz 1, Haus 22-24, 06110 Halle (studienzentrum@francke-halle.de)

[urn:nbn:de:gbv:ha33-1-229075](https://nbn-resolving.org/urn:nbn:de:gbv:ha33-1-229075)

Eine Heerpredigt widder den Türcken.

Martinus Luther.



Ze wol ich ynn meinem
büchlin vom Türckenriege/ fast ge-
nugsam vnterricht gethan habe/ mit
welcherley gewissen vnd weise (wo
sichs begeben) der krieg widder den
Türcken solt für zu nemen sein/ Doch
habe ich bey meinen lieben deudschen die gnade/ das
sie mir widder glauben noch zu hören/ bis das sie zu
lange harren/ vnd der glaube ynn die hand kömet/
vnd denn widder hülffe noch rat da ist/ gleich wie
dem volck Israel auch geschach/ das sie die Prophe-
ten (als .j. Regum vltimo stehet) so lange ver-
achten/ das zu letzt auch kein rat noch hülffe mehr
da war. Eben so istz vns itzt auch gangen/ Nie-
mand wolt glauben/ was ich vom Türcken schreib/
bis das wirs nu mit so grossem iamer erfahren/ vnd
so viel tausent menschen/ ynn so wenig tagen/ erwür-
get vn weg gefüret gesehen haben/ Das wolten wir
haben/ Vnd hette nicht Gott wunderlich vnd so vn-
nerschens vns geholffen/ So solten wir erst ein rech-
ten iamer ynn deudschen landen erfahren haben.

Vnd kenne ich recht meine lieben deudschen/ die
vollen sewe/ so sollen sie wol/ yhrer weise nach/ sich
widderumb nidder setzen/ vnd mit guttem mut ynn

A ij

aller

*Securitas
carnalis li-
es et pestis
Christia-
nismu.*

aller sicherheit/ zechen vnd wol leben/Vnd solcher
grossen gnade erzeigt/gar nicht brauchen/sondern
mit aller vndanckbarkeit vergessen/Vnd dencken/
ha der Türcke ist nu weg vnd geflohen/Was wollen
wir viel sorgen vnd vnnütze koste drauff wenden?
Er kömpt vielleicht nymer mehr widder/Auff das
wir ia vnser wol verdiente straffe von Gott redlich
empfaben/Wolan ich kan doch nicht mehr thun/
Do ich anzeigt/man solt des Türcken gewalt nicht
verachten/Ly das war ein spöttische vnd nichtige
rede/Da waren viel Fürsten mechtiger denn er/Ich
solte die deudschen fürsten nicht so schrecken noch
verzagt machen/Las nu die selbigen geysserer erfür-
treten/ vnd die fürsten trösten/ vnd des Türcken
macht verachten. Ich meine ia/der Türcke habe sie
zu lügenern/ vnd mein wort war gemacht.

Aber doch vmb der gottlosen vnd Christus leste-
rer willen/nichts angefangen/also auch vmb yhrer
willen nichts gelassen. Es haben könye vnd fürst-
en/Bischoff vnd pfaffen bis her das Euangelion
veriaht vnd verfolget/viel bluts vergossen/vnd den
dienern Christi alle plag vnd vnglück angelegt/vnd
ist die lesterung vñ schmach/auch widder die offent-
liche erkante warheit/ so vber die massen schendlich
gros gewesen/ vnd das volck so vber aus böse vnd
mutwillig/das ich hab weissagen müssen/Deudsch
land müsse ynn kurtz Gott eine torheit bezalen.
Dasselbige gehet itzt daher/vnd sehet an/Gott hel-
ffe vns vnd sey vns gnedig/Amen. Denn weil sie
widder Christum so trefflich zornig vnd böse sind/
das

das sie sein wort vnd diener vberbösen/Vnd er müß
leiden vnd schwach gegen sie sein/So thut er war-
lich recht nach dem sprich wort (Es ward nie keiner
so böse/Es kam noch ein böser vber yhn) vnd zeucht
ab/lest sich vber bösen/Schicket aber an solche böse
zornige innckern/nach einen bösern/den Türcken/
Wil zusehen/weil sie ia böse sein wollen/welcher hie
den andern vber bösen werde/Sey nu böse/wer bö-
se sein kan/itzt gilts bösens/vnd vber bösens.

Solchs wil ich gesagt haben/widder die vn-
puffertigen/starrige feinde vnd verfolger des worts
Christi/Aber weil dennoch viel ynn deudschen lan-
den sind/die das wort lieben/vnd Christus on zwey
ffel/nicht ein geringe zal glieder drynnen hat/vmb
der selbigen willen/sol diese heerpredigt aus gehen/
sie zu trösten vnd zuermanen/ynd diesen gewolich-
en ferlichen leufften/Denn der teuffel sucht durch
seinen zeng den Türcken/freilich nicht allein die welt
liche herschafft/Sondern auch das reich Christi/
vnd seine heiligen vnd glieder/vom glauben zu sto-
ssen/wie Daniel sagt/am siebenden Capitel. Dar-
umb wil ich diese predigt ynn zwey stück teylen/zu
erst/die gewissen vnterrichten/darnach auch die
faust vermanen.

Das gewissen zu vnterrichten/dienet wol zur-
fachen/das man gewis sey/Was der Türcke sey/
vnd wo für er zurhalten sey nach der schrift/Denn
die schrift weissagt vns von zweyen grausamen
Tyrannen/welche sollen für dem iüngsten tage die
Christenheit/verwüsten vnd zurstören/Einer geist-

21 ij

lich

lich mit listen odder falschem Gottes dienst vnd lere/
widder den rechten Christlichen glauben vnd Euan-
gelion/ Danon Daniel schreibt/ am eylfften Capit.
das er sich sol erheben vber alle Götter/ vnd vber al-
le Gottes dienst zc. Welchen auch Sanct Paulus
nennet den Endchrist/ ynn der ander Epistel/ zu den
Thessalon. am andern Capit. Das ist der Babst
mit seinem babstum/ danon wir sonst gnug geschrie-
ben. Der ander/ mit dem schwerd leiblich vnd eusser-
lich auff's greulichst/ danon Daniel am siebenden
Capit. gewaltiglich weissagt/ Vnd Christus Mat-
thei am vier vnd zwentzigsten Cap. von einem trüb-
sal/ des gleichen auff erden nicht gewesen sey/ das ist
der Türcke/ Also mus der teuffel/ weil der welt ende
fürhanden ist/ die Christenheit zuuor/ mit beyder sei-
ner macht auff's aller greulichst angreifen/ vnd
vns die rechte letze geben/ ehe wir gen himel faren.

Wenn ein Christen will sein/ zu dieser zeit/ der
fasse ein hertz/ ynn Christo/ vnd dencke nur nicht hin-
furt auff fride vnd gutte tage/ Die zeit solcher trüb-
sal vnd weissagung ist da/ desselbigen gleichen vnser
trotz vnd trost/ auff die zukunfft Christi/ vnd vnser
erlösung ist auch nicht fern/ sondern wird flugs
drauff folgen/ wie wir horen werden/ Darumb so
halt feste vnd sey sicher/ das der Türcke gewislich
sey der letzte vnd ergeste zorn des teufls widder
Christum/ damit er dem fass den boden ausstösset/
vñ seinen grym gantz ausschüttet/ widder Christus
reich/ Dazu auch die grössste straffe Gottes/ auff
erden vber die vndanckbarn vñ gotlosen verechter/
vnd

vnd verfolger Christi vnd seines worts / Vnd on
zweiffel der vorlauff der hellen vnd ewiger straffe/
Denn Daniel sagt/ das noch dem Türcken flugs
das gericht vnd die helle folgen sol/ Vnd man sibets
auch zwar/ wol an der that/ wie gewulich er die leut/
kind/ weiber/iung vnd allt erwürget/ spießet/ zu ha-
cket/ die yhm doch nichts gethan/ vnd so handelt/
als sey er der zornige teuffel selbs leibhafftig/ Denn
nie kein königreich also getobet hat/ mit morden vnd
wüeten/ als er thut. Wolan wir wollen das hie von
dem Propheten Daniel hören.

Vier keiserthum hat Daniel beschrieben / die
auffer den kometen sollen/ ehe der welt ende keme/ wie
wir lesen/ Danielis am siebenden Capitel.

Das er vier grosse thier sahe aus
dem meer steigen/ das erst/ war glei-
ch einer Lewin/ vnd hatte adelers
flügel/ Das ander war gleich einem
Beren/ vnd hatte drey rigen zeene
ynn seinem maule/ Das dritte/ war
gleich einem Parden/ vñ hatte vier
flügel/ vnd vier köpffe/ Das vierde
war ein grausam/ vnd wunderlich
thier/ vnd seer starck/ vnd hatte gro-
se eiserne zeene/ damit es fras vnd
vmb

Legatus
Explicatio
Dextus.

ymb sich reis/vnd was vbrig bleib/
das zutrats mit seinen füßen/ Vnd
hatte zehen hörner/ Ich sahe die
hörner an/ vnd sihe/ zwischen den
selbigē wuchs ein ander klein horn/
fur dem selbigen wurden drey der
ersten hörnen abgestossen/ vnd das
selbige horn hatte augen/ wie men-
schen augen/ vnd sein maul redet
grewlich ding/ Ich sahe zu/ bis stüle
gesetzt wurden/ Vnd der Alte sich
setzet/ Das gericht ward gehalten/
vnd die bücher auff gethan/ Ich sa-
he zu/ ymb der gewulichen rede wil-
len so das horn redet/ Vnd ward ge-
war/ das das thier getodtet war/ vñ
sein leichnam umbkomen/ vnd yns
feur geworffen war zuuerbrennen/
Vnd der andern thier gewalt auch
auffgehoben war.

Das

Das ist der text Daniel/auffs kurtzest erzelet/
so viel vns itzt not ist/ In die auslegunge folget ym
selbigen capitel hernach/da er spricht/ Ich trat zu
einem der da bey stund/vnd fraget yhn vmb das al-
les die warheit/Vnd er legt mirs aus/vnd leret mich
also. Diese vier grosse thier/sind vier keiserthum/
die auff erden komen sollen/Aber die heiligen des
Wohsten werden ynn ewigkeit das reich besitzten/
Darnach hette ich gerne gewust/was das vierde
thier were/das so fast grausam war/Welchs eiser-
ne zene vnd pfoten hatte/vnd fras vnd reis/vnd das
vbrige mit füssen zutrat/Vnd was die zehen hörner
auff seinem kopffe weren/Vnd was das ander horn
were/für welchem drey hörner gefallen waren/Vñ
von dem selben horn/das augen hatte/vñ ein maul/
das grewliche ding redet/vnd war grösser denn die
andern/ Ich sahe zu/vnd sihe/das horn streit wid-
der die heiligen/vnd sieget yhn an/bis der Alte kam
vnd hielt gerichte mit den heiligen des Wohsten/
vnd die zeit kam/das die heiligen das reich besassen.

Vnd er sprach also/Das vierde thier wird das
vierde keiserthum sein auff erden/Welchs wird grö-
sser sein/denn alle königreiche/vnd wird alle land
fressen/zutretten vnd zu malmen/Die zehen hörner
sind zehen könige/so zu solchem keiserthum gehören
Vnd nach dem selbigen/wird ein ander auff komen/
der wird mechtiger sein/denn die ersten/vnd wird
drey konige demütigen/Vnd wird widder den Wo-
hesten reden/vnd die heiligen des Wohsten zutret-
ten/Vnd wird sich vnterstehen/ordnung vnd gesetz

zu endern/Vnd sie werden ynn seine hende gegeben
werden/eine zeitlang/vnd aber etliche zeit/vnd noch
ein wenig zeit/ So wird denn das gericht gehalten
werden/das die gewalt auffgehaben werde/vnd zu
brochen/vnd endlich vmb kome/Aber das reich/ge-
walt vnd macht/ so vnter dem gantzen hymel ist/
werde gegeben/ den heiligen des aller Nohesten/
Welchs reich ist ewig/vnd alle kōnige werden yhm
dienen vnd gehorsam sein.

*Conspice-
tus Chrono-
logia*

Diese weissagung Danielis/ist eintrechtiglich
von allen lerern ausgelegt/von den vier folgenden
keiserthum/ Das erst/das keiserthum zu Assyrien
vnd Babilonien/ Das ander/das keiserthum der
Persen vnd Meden/ Das dritte/das keiserthum/des
grossen Alexanders vnd der Kriechen/ Das vierde/
das Rōmische keiserthum/welchs das grōssest/ge-
waltigst vnd grausamest/ dazu auch das letzte ist
auff erden/wie hie Daniel klerlich zeigt/das nach
dem Vierden thier odder keiserthum/ das gericht
folget/vñ kein ander keyserthum mehr/sondern das
reich der heiligen das ewig ist &c. Weil denn nu
das gewis ist/vnd keinen zweiffel hat/das auff er-
den sol das Rōmisch reich das letzte sein/wie auch
ym andern Capitel Daniel zeigt/ynn dem grossen
bilde odder seulen/die einen gūlden kopff/sylbern
brust/eherne hüffte/vnd eisern schenckel hatte/ So
mus das draus folgen/das der Türck ym Rōmisch
en keiserthum sein wird/vnd ym vierden thier mus
begriffen sein/ Denn das ist beschlossen/weil das
Rōmisch keiserthum/ das letzte ist/ So wird vnd
tan

kan der Türcke nymer mehr so mechtig werden/als
das Römisch reich gewesen ist/sonst würden nicht
vier / sondern funff keiserthum auff erden komen/
Darumb mus der Türcke kein keiser werden/nach
ein new odder eigen keiserthum auffrichten/wie ers
wol ym synhabt/Aber es wird vnd mus yhm ge
wislich feylen/odder Daniel würde zum lügener/
Das ist nicht möglich

Weil aber zu dem der Türcke/dennoch so gros
vnd mechtig ist/vnd ym Römischen reich sitzen sol/
müssen wir yhn ynn dem selbigen suchen/vnd vnter
den hörnern des vierden thiers finden/Denn es mus
ein solch gewaltig ding ynn der schrift verkündigt
sein. Wolan/ Horn heist ein königreich ynn der
schrift/wie hie Daniel selbs sagt/das die zehen hör
ner zehen könige sind/die zum vierden keiserthum ge
hören/So kan nu der Türcke/ keines der selbigen
zehen sein/ denn die selbigen hörner sind die könig
reich/so zum Römischen keiserthum gehört haben/
da es ynn seiner vollen macht gestanden ist/als nem
lich/ Hispanien/ Frankreich/ Italia/Africa/Egyp
tus/Syria/Asia/Bretia/Deutschland &c. Solch
land haben die Römer alle gehabt yn voller macht/
ehe denn der Mahometh odder Türck ist komen/So
spricht nu Daniel/das nach solchen zehen hörnern/
erst kompt das kleine horn/zwischen den zehen hör
nern/Die kompt vnd findet sich der Türcke/Denn
gleich wie das kleine horn / vnter den zehen auff
wechst/vnd stößet der selbigen drey weg/Also mus
ste ia komen ein königreich/ das ynn den obgenan
ten lndern vnd königreichen des vierden thiers od

Conferatur
Tranquilli
Parti huius An-
tonici Palma-
ta oratio an-
tra Turcas
ad Germanos
quod ab Autore anno 1518. VIII. Cal. Iul. Augu-
sto Vinde-
coru ppter
Tempore Ma-
ximiliani Ca-
saris. p.

der keiserthums wüchse/ vnd der selbigen drey ge-
winne/ Solchs alles zeigt vnd bezeugt auch das
werck/ vnd symmet mit dem Text/ das der Maho-
meth dasselbige kleine hörn sein mus/ Denn er ist
von geringem anfang auff komen/ Er ist aber also
gewachsen/ das er drey hörner ym Römischen key-
serthum hat abgestossen vnd eingenomen/ nemlich/
Egyptum/ Griechland vnd Asiam/ Denn der Soltan
vnd Sarracener haben lange zeit dieser hörner
odder königreich zwey ynnen gehabt/ Egypten vnd
Asiam/ vnd sind also drinnen blieben sitzen/ wie auch
der Türck drinnen sitzt auff den heutigen tag/ vnd
hat das dritte horn/ Griechland dazu gewonnen/
Solchs hat sonst neimand gethan/ vnd wir sehens
da für augen stehen/ das geschehen ist/ Das ist/ Ma-
homeths reich/ da haben wir das kleine horn gewis.
Ob nu wol der Türcke den Soltan veriaht vnd
solche lender eingenomen/ vnd seinen hoff odder sitz
anders wo hellt/ denn der Soltan thet/ ist's darumb
kein ander odder new reich/ sondern eben dasselbige
Mahomeths reich/ Denn beyde Soltan vnd Türck
des selben vnd gleich eines glaubens sind/ nemlich/
des Mahomeths. Das aber einer den andern ver-
iaht/ ist auch wol fast ynn allen keyserthumen ge-
schehen/ das ein bruder den andern veriaht/ ein
ambtman seinen herrn vertrieben hat/ Wie gescha-
chs ynn Persen/ da sie den keyserlichen sitz vnd hoff
aus Medien ynn Persien versetzten/ bleib dennoch
gleichwol dasselbige keyserthum/ Vnd das keyser-
thum zu Assyrien von Ninine gen Babylon/ Vnd
das

das Römisch von Rom gen Constantinopel versetzt
ward/also ist auch itzt das Mahomeths reich von
Makayr gen Constantinopel versetzt/mit dem hofe
lager/Aber ist gleich wol dasselbige Reich des Ma-
homeths blieben / Denn person vnd hofelager mü-
gen sich ynn eym reich wol endern / das dennoch
das reich für sich selbst bleibe/ynn seiner weise/regi-
ment/glaube vnd allem wesen.

So wir nu das selbige kleine horn/den Maho-
methen vnd sein reich hie gewislich haben/So kön-
nen wir nu leichtlich vnd klerlich aus Daniel ler-
nen/Wo für der Türcke vnd das Mahometisch reich
zu halten sey / Vnd auch/ was er für Gotte gelte/
Erstlich sol er wol ein mechtiger herr sein / als der
dem Römischen reich/drey hörner/das ist/drey fast
die besten Königreich/als Egypten / Gretiam / Asi-
an/abgewinnen vnd behalten / vnd damit Mechtiz-
ger sein/denn keines vnter den zehen hörnern ist /
Das ist der klare text/Vnd findet sich also ym wer-
ck/ Denn kein König/so vnter den Römern gewest/
als Frankreich/Hispanien/Welschland/Deudsch-
land &c. so mechtig ist/als das Türkisch odder Ma-
hometisch reich/das der Türcke itzt hat/Vnd sitzt al-
so fast mitten ym Römischen Reich/ia ynn des Rō-
mischen Keyfers hause zu Constantinopel / wie das
kleine horn vnter den zehen hörnern ym vierden thier
bedeutet.

Zum andern hat das horn/Menschen augen/
das ist/des Mahomeths Alkoran odder gesetz/da-
mit er regirt/In welchem gesetz ist kein Göttlich
ange/sondern eitet menschliche vernunft/on Got-

B ij

tes wort

tes wort vnd geist/ Denn sein gesetz leret nichts anders/ denn was menschliche witze vnd vernunft wol leiden kan/ Vnd was er ym Euangelio funden hat/ das zu schwer vñ hoch zu glauben gewesen/ das hat er ausgethan/ sonderlich aber das Christus Got sey/ vnd vns erlöset hat mit seinem tode ꝛc. Das meint Daniel/ da er des horns ange deutet vnd spricht/ Er wird sich vnterstehen/ gesetz vnd ordnung zu endern/ vernym/ Gottes ordnung/ als das Euangelion vnd Christliche lere.

Zum dritten/ hats ein maul das redet gewolliche ding/ das sind die grausamen lesterungen/ damit der Mahometh Christum nicht alleine verlencket/ sondern auch gantz auff hebt/ Vnd gibt für/ Er sey vber Christum/ viel höher vnd würdiger für Gott denn alle engel/ alle heiligen/ alle Creatur/ dazu vber Christum selbs/ wie das yn seinem Alkoran klerlich stehet/ vnd die Türcken teglich rhümen/ vnd yhe lenger yhe gewollicher solche lesterung treiben vñ vben/ Darumb spricht hie Daniel von dem selbigen horn vnd deutet desselbigen grossen maul. Er wird wider den Höhesten reden/ das ist/ wider Christum leren/ yhn lesteren vnd schenden/ damit/ das er yhn nicht für den höhesten/ sondern für einen schlechten/ vnd viel geringern propheten hellt/ denn sich selbs/ vnd spricht/ Christus lere habe ein ende/ da Mahometh komen sey.

Zum vierden/ das er wider die heiligen des höhlsten krieg füret/ Dis darff ia keiner glosen/ Ich meine/ wir habens bisher wol gesehen vnd gefillet/
Denn

Denn der Türck keinem volck so feind ist auff erden/
als den Christen/ Streit auch widder niemand mit
solchem blutdurst/ als widder die Christen/ auff das
er diese weissagung Danielis erfülle. Daniel aber
heist/ die Christen/ heiligen des Döbisten/ Denn ob
wol viel falscher Christen sind vnter dem hauffen/
Weil aber das Euangelion vnd Sacrament/ von
Christo befolhen/ ynn einem lande bleibt/ so sind ge
wislich ynn dem selbigen lande viel Christen/ Vnd
wie wenig der selbigen ist/ so wird doch dasselbige
land/ vmb yhrs glaubens/ predigens vnd Euange
lions willen/ Ja vmb Christus willen/ welchs na
me/ wort/ geist/ Sacrament daselbst ist/ Christen
land vnd rechte heiligen Gottes genand/ Darumb
auch noch ynn der Türckey viel Christen sind/ Vnd
villeicht mehr denn sonst ynn einem lande/ als die
da gefangen sind vnd dem Türcken dienen müssen/
der sie gewonnen hat/ wie Daniel hie saget/ das er
siegen solle widder die heiligen/ vnd vber sie herrsch
en.

Gleich wie zur zeit Elia des propheten ym volck
Jsrael geschach/ Da so viel böser/ vnd wenig frö
mer leute waren/ das Elias selbs meynet/ Er were
allein/ vnd wündschet darumb tod zu sein/ Aber den
noch wol sieben tausent funden wurden/ die Gott
yhm behalten hatte frömm vnd heilig/ Vmb welcher
willen/ dennoch/ das volck Jsrael Gottes volck vnd
Gottes heiligen hießen/ als bey welchen sein name/
wort vnd geist wonete/ Wie itzt auch vnd bisher vn
ter dem Papsttum geschehen/ da es auch alles also
gar ist verterbet gewest/ mit menschen leren vnd
wercken/

wercken/das man schier keine Christen mehr gese-
hen hat/Alber dennoch haben etliche da müssen sein/
weil Christus name/Tauffe/Euangelion/Sacra-
ment blieben ist/ Vmb welcher willen/ auch das
gantze land/der Christen land/vnd sie die Christen-
heit odder Christus volck vnd Gottes heiligen heis-
sen/Denn Paulus sagt. ij. Thess. iij. Der Endchrist
der Papst/ solle ym tempel Gottes sitzen/ Tu ist der
Tempel Gottes/die Christenheit odder die heiligen
Gottes/wie Daniel redet.

Auch so mus man ynn diesem spruch Danielis
mehr achten vñ richten nach des Türcken meinung
vnd willen/denn nach der Christen zal/ Denn der
Türcke hellt hie keine rechnung noch vnterscheyd/
wie viel odder wenig heiliger Christen vnter vns sey-
en/Er hellt einen wie den andern/achtet vns alle für
Christen/wie denn der name Christus vns allen ge-
mein ist/Denn er ist dem Christlichen namen feind/
den selbigen wolt der teuffel gerne vnterdrücken mit
dem schwerd des Mahomeths/wie er denn auch
mit falscher lere bey vns den selbigen vnterdruckt/
Vnd wil sich also an vnserm Herrn Christo rechnen/
Also wil Daniel sagen/Das nach des Türcken ge-
wissen vnd meinung alles Christen (das ist heiligen
Gottes) sind/die er bekriegt/Vnd hellts dafür/das
kein erger volck auff erden sey/denn die Christen/
Darumb nennen vns auch die Türcken nicht an-
ders/denn Paganos/das ist/heiden/Sich selbs
aber halten sie für das heiligste volck auff erden.

Das funfft/das er (wie gesagt) glück hat ym
kriegen

Kriegen wider die Christen vnd gemeiniglich oblige
vnd den sieg behelt/Vnd dasselbige stück macht auch
die Türcken/so stoltz/verstockt vnd sicher ynn yhrem
glauben/das sie gar nicht zweifeln/yhr glaube sey
recht/vnd der Christen falsch/als den Gott so viel
sieg gibt vnd die Christen also verlesst/Wissen aber
nicht/das hie ym Daniel also zunor verkündigt ist/
das die Christen vmb yhrer sünde willen hie auff er-
den gestrafft/vnd die vnschuldigen zu Werterer ge-
macht werden/Denn Christus mus Werterer ha-
ben/Darumb hat er allezeit die seinen lassen leiblich
vnterligen vnd schwach sein/Widderumb seine fein-
de obligen vnd mechtig sein/Auff das er die seinen
sege vnd reinige/darnach seine feinde/wenn sie wol
angelanffen vnd auff's höchsten kometen sind/heym-
suche mit dem hellischen feure ewiglich/Solch vr-
teil vnd weise wissen die blinden vnsinnigen leute
nicht/Vnd meinen/weil sich Christus so schwach
stellet/Es sey kein volck auff erden angenehmer denn
sie/Aber gar weidlich lauffen sie an/vnd wird sich
das spiel plötzlich wenden/ehe sie meinen/wie fol-
get.

Zum Sechsten/sol stugs auff's Türcken reich
vnd wneten/der iüngst tag vnd das reich der heili-
gen komet/Wie Daniel hie spricht/das des horns
krieg vnd sieg sol weren/bis der Alte komet vnd setze
sich zu gericht/Solch dreyen vnd schrecklich gericht
glauben die Türcken auch nicht/das Gott damit
vns erlösen/vnd sie ynn die helle stossen wird/Wie
lange aber das weren solle/das er so sighafft sey/
E kan

12 34
 kan niemand wissen/Denn Christus sagt/das von
 dem tage niemand wissen solle/on der Vater allei-
 ne/wie denn hie Daniel auch mit tuncfeln worten
 sagt/Sie werden ynn seine hende gegeben eine zeit-
 lang/vnd aber etliche zeit/vnd noch ein wenig zeit/
 So wird denn das gericht gehalten werden.

Aus dem es scheint/das des Türcken reich
 von hymel gestörtzt werden sol/Vnd kein könig ko-
 men werde/der yhn vnterdrücke vnd mechtiger wer-
 de nach yhm/wie auch Daniel hie sagt/das der leib
 des vierden thiers nach dem grossen lestern des klei-
 nen horns yns feur sol geworffen werden zuerbren-
 nen. So stehet ia auch ym Apocalypsi am zwentzig-
 sten/das der Gog vnd Magog/solle durchs feur
 vom hymel verzeret werden/Eben dasselbige schrei-
 bet auch Ezechiel am dreyssigsten capitel/das Gott
 wolle feur vnd schwefel vber Gog vnd Magog rege-
 nen lassen vnd vber yhr heer/Nu ist kein zweifel/
 Gog/sey der Türcke/der aus dem land Gog odder
 der Tattern komen ist ynn Asian/wie die historien
 beweisen.

Weil aber dennoch Christus hat zeichen gege-
 ben/da bey man kennen sol/wenn der iüngst tag na-
 he sey/vnd dem nach/wenn der Türcke ein ende ha-
 ben werde/So können wir sicherlich weissagen/das
 der iüngst tag müsse für der thür sein/Denn weil
 Daniel hie sagt/das ym vierden thier das kleine
 horn solle das mechtigste vnd letzte sein/Vnd wir
 sehen öffentlich/das ynn des Römischen reichs len-
 dern kein mechtiger ist/denn der Türcke/vnd nach
 yhm

yhm keiner mehr komen wird/so ist die schrift des
Türcken halben schon erfüllet / Denn / Er hat die
drey hörner weg (wie gesagt) Vnd Daniel gibt
yhm kein horn mehr / Dem nach ist zu hoffen / das
der Türcke hinfurt kein land des Römischen reichs
mehr gewinnen wird / Vnd was er ynn Hungern
vnd Deudschen landen thut / das wird das letzte
getretze vnd gereuffe sein / das er mit den vnsern vnd
die vnsern mit yhm haben werden / Vnd damit ein
ende / also das er Hungern vnd Deudsche land wol
zausen mag / aber nicht rügelich besitzen / wie er Asia
am vnd Egyptum besitzt / Denn Daniel gibt yhm
drey hörner vnd nicht mehr / zwack vnd reisset er et-
was den grentzen vnd nachtbarn abe / das sey sein
schlaff trunck zu guter nacht.

Warumb der krieg vnd sieg des Mahomeths/
dauon Daniel sagt / ist am meisten geschehen vnd
erfüllet / ynn Asia / Gretia / Egypto / Vnd wird also
ein ende nemen / wenn er am aller mechtigsten vnd
auff's aller best gerüst ist / das er gleich sicher daher
schwebt vnd feret / als dem nu niemand weren
noch widderstehen könne / vnd noch viel land zu ge-
winnen gedenckt / Eben wenn das selb stündlin ko-
men wird / das er so viel noch thun wil / vnd trotzig
vnd gyrig sein wird / Da wird Christus mit schwe-
fel vnd feur vber yhn komen / vnd fragen / warumb
er seine heiligen / die yhm kein leid gethan / on alle vr-
sache / so grewlich verfolget vnd geplagt habe / A-
men. Denn die schrift ist alle erfüllet / So sind d iese
zeit her so viel zeichen geschehen / Vnd ist so gros lie-

C ij cht des

cht des Euangelij für handen/dazu solch gros les
stern/mutwillen/freuel/yenn der welt/als nie ge
west/auch nicht erger sein künde/Es mus brechen
vnd ein ende haben.

Bis her haben wir nu gesehen/Wo für der
Türcke vnd sein Mahometisch reich zu halten sey/
nach der heiligen schrift/nemlich/das er sey ein
feind Gottes vnd ein lesterer vnd verfolger Christi
vnd seiner heiligen/durch schwerd vnd streit/also
das er gleich darauff gericht vnd gestift ist/mit
schwerd vnd kriegen/widder Christum vnd die sei
nen zu wüeten/Denn ob wol andere Könige vorzeit
ten auch haben die Christen verfolget mit dem sch
werd/so ist doch yhr reich vnd regiment nicht drauff
gestift vnd gericht gewesen/das sie Christum lesteren
vnd bekriegen sollen/sondern geschicht zufalls aus
eynem misbrauch/Wats ein König verfolget/
So ist ein ander König hernach gut gewesen/vnd
hats lassen gehen/Das also/nicht die Königreiche
odder regiment an yhn selbst widder Christum ge
strebt/sondern die personen/so das regiment gehabt
haben/sind zu weilen böse gewesen/Aber des Ma
homets schwerd vnd reich an yhm selber/ist stracks
widder Christum gericht/als hette es sonst nichts
zu thun/vnd könne sein schwerd nicht besser brauch
en/denn das er widder Christum lesteret vnd streitet/
wie denn auch sein Alkoran vnd die that dazu be
weisen.

Aus dem kan nu ein iglicher sein gewissen rich
ten vnd versichern/wo er zum streit widder den Tür
cken gefoddert wird/wie er gedencen vnd sich hal
ten

ten sol/Nemlich/das er keinen zweifel haben sol/
Wer widder den Türcken(so er krieg anfehret)streit/
das er widder Gottes feind vnd Christus lesterer/
ia widder den teuffel selbs streit/Also das er sich
nicht besorgen darff/ob er etwa einen Türcken er-
würgt/das er vnschuldig blut vergiesse odder einen
Christen erwürge/Sondern gewislich erwürget er/
einen feind Gottes vnd lesterer Christi/als den Got
selbs durch die schrift Danielis für einen feind
Christi vnd seiner heiligen/zum hellischen feur ver-
urtheilet hat/Darumb auch kein Christen noch Got-
tes freund ynn des Türcken heer sein kan/er ver-
leugne denn Christum vnd werde auch Gottes vnd
seiner heiligen feind/sondern sind alle des teuffels
eigen/vnd mit dem teuffel besessen/wie yhr herr
Mahometh vnd der Türckisch keiser selbs/Denn
du must die wort Danielis wol fassen vnd mercken/
da er dem kleinen horn das lestermaul widder Gott
vnd den streit widder die heiligen Gottes zu schreibt/
Welche wort nichts guts/sondern alles vbel vnd
bosheit vom Türcken odder Mahometh zeugen.

Darumb hab ich ym vorigen büchlin auch so
trewlich geraten/Das man nicht solle widder den
Türcken kriegen/als vnter der Christen namen/noch
mit streit angreifen/als einen feind der Christen/
Denn hie hörestu/das dem Mahometh odder Tür-
cken der sieg widder die Christen vnd heiligen ver-
kündigt ist/wie denn bisher geschehen ist/ynn den
drey hörnern/die er abgestossen hat/das ist/yn Gre-
cia/Asia/Egypten/Christus wil schwach sein/vnd
C. iij. leiden.

leiden auff erden mit den seinen/auff das er die gewaltigen zu narren vnd zu schanden mache / vnd branche yhres wüetens dazu/das sie yhm (wie wol vnwissend) den hymel voll Werterer vnd heiligen machen/da mit sein reich desto ehe vol werde/vnd er zu gericht kome vnd den tyrannen yhren lohn gebe/ehe sie sichs versehen.

Sondern so hab ich geraten vnd rate noch also/das wol ein iglicher sich vleissigē sol/ein Christen zu sein / willig vnd bereit zu leiden vom Türcken vnd yderman/Aber solle nicht streiten/als ein Christen odder vnter eins Christen namen/Sondern las deinen Weltlichen oberherrn kriegen/Vnter desselbigen panier vnd namen soltu reisen/als ein weltlicher vntersass nach dem leibe/der seinem oberherrn geschworn ist/mit leib vnd gut gehorsam zu sein/das wil Gott von dir haben / zun Römern am dreyzehenden/Titum am dritten capitel/Vnd sonderlich/wo solcher streit geschicht/nicht aus fürwitz/gut vnd ehre zu erlangen/sondern zu schützen vnd schirmen land vnd leute/weib vnd kind &c. wie dieser krieg ist widder den Türcken/Also lesen wir von den lieben heiligen S. Moritz vnd seinen gesellen vnd viel andern heiligen/das sie ynn streit gezogen sind / nicht als Christen/auch nicht widder die Christen/Sondern als vnterthenige gehorsame bürger odder ritter/gefoddert vnd beruffen von yhrem keiser odder ander yhrer oberkeit/den sie mit leib vnd gut zu dienen schuldig waren / Vnd hies nicht ein Christen heer odder volck/noch ein Christen streit/Sondern des keisers volck odder heer.

Siehe

Sihe/also stehet denn dein gewissen recht vnd
fein/vnd kanst ein mütiger freydiger man sein/das
solch hertz vnd mut/on zweifel deinen leib vnd roß
auch beste stercker machen wird/Denn du bist ge-
wis/das du ynn deins oberherrn gehorsam vnd yn
Gottes willen vnd befehl zeuchst vnd streitest/der
dir solche heerfart auff legt vnd von dir haben wil/
So darffstu auch nicht sorgen noch fürchten/das
du ynn der Türcken heer vnschuldig blut treffest/
weil du hörest/das sie von Gott/als seine feinde/
zum tode vnd zur hellen/verurtheilet sind/Vnd gebent
dir/durch deinen oberherrn/das du solch vrtail/an
dem Türcken volbringen solt/vnd itzt deine faust
vnd spies/Gottes faust vnd spies ist vnd heist/Vnd
bist also Gottes des aller grössesten herrn/scharff-
richter odder hencker/widder seinen grossen ver-
dampften feind/Wie köntest du ehrlicher vñ löblicher
streiten?

Gerets aber/das er dich ersticht odder erschle-
cht/wie kanstu redlicher tods sterben/so du anders
ein Christ bist? Denn/zum ersten stehet da Daniel
vnd macht dich zum heiligen/da er spricht/ Der
Türcke streite widder Gottes heiligen/ Das auff
der Türcken vnd teufels seiten die fahr stehet/das er
als ein mörder/eitel vnschuldig vñ heilig blut treffe/
vnd so viel heiliger merterer mache/so viel er auff
vnser seyten erschlegt/Wie es denn gewis ist/das
er eitel vnschuldig blut trifft/weil er die angreiffet/
da er kein recht noch vrsache zu hat/vnd on befehl
vnd not/solch morden für nympt/So ist auch ge-
wis/das er viel merterer mache/(Denn es müssen
Christen

Christen drunder sein/wo der Türcke wider die heiligen streit/als Daniel sagt vnd thut also denn der Türcke an dir/was Daniel von yhm sagt/nemlich/das er ein heiligen mörder vnd merterer mecher ist/
Zum andern/stehe da dein gut sicher gewissen/das du durch Gottes gebot/ynn deins oberherrn einzeltigem gehorsam erfunden vnd erstochen wirst/Vnd wenns gleich zu wechseln sein solt/soltestu/hundert tausent mal lieber ein Christ/gehorsamer bürger odder ritter/vom Türcken erstochen sein wollen/denn des Türkischen keisers selbst sieg/mit alle seinem gut vnd ehre haben/Denn wie gesagt/du bist gewis ein heilige/wo du so thust/das du ein Christ bist vnd ynn gehorsam streitest/Der hymel ist dein/das hat keinen zweifel/Was ist aber des Türcken sieg vnd ehre/ia aller welt/gegen dem hymel vnd ewigem leben?

Gedenck/wie woltestu thun/wenn du zur zeit der Merterer gelebt hettest/da dich auch die bösen keiser vnd tyrannen erwürget hetten/vmb Christus willen? Odder wie woltestu itzt thun/Wenn dich der Papst/Bischoff/vnser keiser odder tyrannen erwürgeten/vmb des Euangelions willen/wie dein vielen geschicht? Du müstest dennoch gleuben/das sie dich zum heiligen vnd Merterer machten/Vnd gewis sein/das du ynn einem rechten stand vnd gehorsam erfunden würdest/Was ist nu der Türcke anders/mit seinem streiten/denn ein solcher böser tyrann/der Gottes heiligen tödtet vnd zu merterer machet/ondas der Türke mit grosser gantzer macht on vnterlas solchs thut/vnd für allen andern viel mehr

mehr heiligen macht/wie sichs denn gebürt am en-
de der welt/das der teuffel vnserm Herrn Christo
ein gute reiche letze gebe/Lieber/Es ist ein trefflich
gros wort/das Daniel sagt/Der Türcke solle nicht
etliche einzelnen heiligen Martern/wie ander Keiser/
sondern mit streit vnd aller macht/angreifen vnd
sie vber weldigen/Im streit aber müssen gar viel
mehr heiligen vnterliggen/denn der einzelen mer-
terer ist/die ausser dem streit hin vnd widder gemar-
tert werden.

So weistu ia wol/das du dennoch ein mal ster-
ben must/vnd keinen tag noch stunde des todes
sicher bist/Wie wenn denn solcher streit widder den
Türcken/eben dein stündlin sein solt/vnd von Gott
also verordnet were? Soltestu nicht lieber/ia dazu
mit freuden/dich alda Gott ergeben/ynn einen sol-
chen ehrlichen/heiligen todt (da du so viel Göttlich-
er vrsachen/gebod vnd befelh hast/vnd sicher bist/
das du nicht/ynn deinen sunden/sondern ynn Got-
tes gebod vnd gehorsam stirbest/villeicht ynn einem
augenblick aus allem iamer kempst/vnd gen hymel
zu Christo aufflengest) Denn das du auff dem bet-
te müstest liggen/vnd dich lange/mit deinen sun-
den/mit dem tod vnd teuffel reißen/beißen/kemp-
fen/vnd ringen ynn aller fahr vnd not/vnd den-
noch solche herrliche Gottes befelh vnd gebod nicht
haben? Die stirbstu allein für dich selbst/vnd frisset
dich ein amechtige drus oder pestilentz dahin/Dort/
spricht Daniel/sterben viel heiligen mit dir/vnd hast
Göttliche/heilige/liebliche gesellschaften/die mit
dir faren.

D Sum-

Summa/Wer kan allerley fahr des todes erzelen / darynn wir teglich schweben / zu wasser / zu feur / zu feld / zu haufe / ynn der lufft / auff erden / So viel thier / so viel seuchen / sind vmb vns / Der felle vom dach / der vom ros / der felle ynn sein messer / etlich / hengen / erstechen / erseuffen sich selbs / Der kompt sonst / der so vmb / Der wird vmb gellts willen / der vmb eins weibs willen / der vmb eins worts willen / Ja etlich vmb wolthat willen / erschlagen / So mancherley töde müssen wir teglich gewarten / vnd wagens etlich mit freunden / da doch kein redlich vrsach noch Göttlich befehl ist / dazu die hinfart ferlich / vnd mislich ist / wie man dort ankome / Vnd solten vns hie so faul odder verzagt stellen / da wir gewissen Gottes befehl vnd gefallen haben / vnser oberkeit zu gehorchen mit leib vnd gut / Dazu so wir Christen funden werden / gewis das ewige leben mit den heiligen haben / Were doch solcher tod zu suchen an der welt ende / wenn das stündlin da ist / Vnd wer sich solchs nicht bewegen leßt / dem were kein billicher fluch zu wünschlen / denn das er zum Türcken siele vnd ein Türke würde / des teuffels leib eigen / wie sein herr der Türke ist / von Gott zum tode vnd der hellen verdampt.

Solchs alles rede ich für die / so Christen sind odder gerne weren / das sie wissen / wie sie sich zu dieser zeit richten vnd trösten sollen / das sie nicht zu fast erschrecken für dem Türcken / noch für dem teuffel seinem Gott / Denn wenn der Türke die Christen (so es möglich were) schon alzu mal fresse / hette er damit

damit nichts gewonnen/denn das sein verdammnis
deste grösser würde vnd deste eilender keme/vnd die
Christen deste ehe gen hymel führen/Er sey so zornig
vnd wüetig/als er ymer wil/mit allen teuffeln dazu/
so mus er knecht vnd diener sein der Christen/Vnd
eben damit zu yhrem besten helffen/damit er sie mey
net zu verderben/Denn da stehet Daniel/vnd spriz
cht/Es seyen heiligen/die er schlegt vnd würet/
So spricht S. Petrus/Vnd wer ist der euch schad
den kan/so yhr dem guten nach strebt? Dauid auch
ym hundert vnd funfftzehenden Psalm/D wie köst
lich ist für dem Herrn der tod seiner heiligen/Vnd
ym ein vnd siebentzigsten Psalm/Vnd yhr blut ist
theur für seinen augen/Solche vnd der gleichen
tröstliche/herrliche sprüche/machen ein solch vrteil/
das der Türck sey ein heiligen mörder/vnd thu yhm
selbs damit den grösten schaden ewiglich/Widder
umb/das sein zorn vnd morden/müsse hie zeitlich
dienen vnd helffen/den Christen zu grosser ewiger
herrligkeit/on seinen danck/on seinen willen vnd
wissen.

Wer teuffcht vnd mordet nu hie den andern am
besten? Der Türcke mordet die Christen zeitlich zum
ewigen leben/Aber eben ynn dem selbigen mordet er
sich selbes zum ewigen hellischen feur mit allen teu
ffeln/Denn die Christen haben zu herrliche mecht
tige sprüche/wie gehört/Vnd/Daniel heisst sie hei
ligen/vnd den Türcken einen heiligen mörder/Da
wird er nicht viel an gewinnen/vnd die Christen ni
cht viel verlieren/Aber so sol der Mahometh mit
den seinen bezalet werden/vnd die Christen an sich
D ij selbs

Bekehr
Joh. Hag.
Dann
Joh. Hag.
von Ferro
et flamma
ausf.

selbs rechnen/vnd seinen lohn von sich selber empfas
hen. Darumb halt ich das nicht für ein meister-
stück/das der Türcke die Christen zu schrecken / yhre
kindlin zu hewet / zu sticht / vnd auff die zaunstecken
spiesset / vnd was sonst nicht fort kan / alles erwir-
get vnd grausam handelt / Es ist mehr ein gros nar-
ren stück / auch für der welt / Denn damit würde kein
frum man sich schrecken lassen / das er sehe sein kind
vnd weib zu hacken vñ zu spiessen / sondern viel mehr
zornig vnd bitter werden / vnd vollend hinan setzen
vnd wagen strumpff vnd stil / vñ was da noch vbrig
were / Vnd ob er tod were / würden odder solten yhe
die andern vbrigen desto bitterer vnd zorniger wer-
den / auch alles vollend / an die teuffels gelieder zu
wagen. *lege kistoriam, von Lufibry, Hering.*

Alber für den Christen ist solche wüeterrey viel
weniger schrecklich / Denn die wissen / das solche ge-
spiessete vnd zu hachteelende kindlin vnd frume leu-
te / eitel heiligen sind / Vnd das yhn der Türcke das
hunderste teil nicht künde so viel guts thun / wenn
er ein iglichs / auch zum Türckischen keiser selbs ma-
chete / als er damit thut / das er sie / aus des teuffels
zorn / so grausam handelt / Denn er opffert sie damit
Gott ynn den hymel / Vnd künde auch alle welt sich
nicht so reichlich vnd herrlich an yhm rechnen / als er
an sich selbs solche leute rechet / Denn er stößet sich
selbs damit ynn abgrund der hellen / Ja sprichstu /
Des lachet er vnd fragt nichts darnach / mit allen
den feinen / Wolan / er solt auch lachen / dazu nicht
werd sein / das ers gleben odder erkennen solle /
Christus wird yhn das lachen bald vertreiben / vnd
das.

das alles wol lernen/Denn ich dis(wie gesagt)den
Christen schreibe zu trost/vnd nicht den Türcken
odder Türcks genossen zu lachen/Daniel hat yhm
für vns allen gnug geschrieben/da er yhn einen feind
vnd lesterer Gottes/zum hellischen feur verdampt/
verkündigt/Wird Daniels schrift veracht/so ligt
nichts dran/ob vnser schrift auch verlacht werde/
Wir haben den text/der vns nicht leugt noch treugt/
das Gottes heiligen sind/widder welche der Tür-
cke streit/Sinds heiligen Gottes/so fragt ein Chri-
sten nicht gros darnach/wie grausam der Türcke
odder der teuffel mit den kindlin vnd Christen eusser-
lich am leibe vmbgehet/Es müssen doch Engel da
sein/die auff yhre seele warten/vnd sie auff den hen-
den tragen vnd gen hymel bringen.

Denn es stehet geschrieben ynn dem neuntzig-
sten Psalm/Er hat seinen engeln befehl vber dir ge-
than/das sie dich auff den henden tragen/auff das
du deinen fuß nicht an einen stein stoffest/So sprich
auch Christus Matthei am achtzehenden/Ich
sage euch warlich/das yhr engele sehen allezeit das
angesicht meines Vaters ym himel/Wir lesen ynn
der könige bücher vom propheten Elisa/wie er gan-
tze berge vol feurriger wagen vnd reuter vmb sich sei-
nem diener zeigte widder die Syrier/So dazu mal
so viel Engel vmb die Stad waren zum leiblichen
schutz/wie viel mehr/meinstu wol/das hie ynn sol-
chem streit/die Engel da sind/empfaben vnd be-
schützen geistlich die seelen der Christen/odder wie
Daniel sagt/der heiligen Gottes/Das aber die
D iij Chri

hen vnd drein schmeissen/wie gehorsame vnterthanen/Werden sie darüber erschlagen/Wolan/so sind sie nicht allein Christen / sondern auch gehorsame trewe vnterthanen gewesen / die leib vnd gut ynn Gottes gehorsam bey yhre oberherrn zugesetzt haben/Selig vnd heilig sind sie ewiglich/wie der frumme Drias.

Conferatur

Tractatus

Don. 10.

B. W. a. et

passim

W.

W.

W.

W.

W.

W.

W.

W.

W.

W.

W.

W.

W.

W.

W.

W.

W.

W.

Tractatus vom Ring wider Euren

Aber weil der Türcke gleichwol Gottes rute

vnd eine plage ist vber die sünde/bede der Christen

vnd vnchristen/odder falschen Christen/so sol sich

solches trostes vnd trotzes/danon bis her gesagt/

nicht ein iglicher an nemen/Vnd tolltune daher fa-

ren/vñ sprechen/Ich bin ein Christ/Ich wil dran/

Sondern zunor/sich bekeren vnd sein leben bessern/

vnd also mit furcht vnd ernstlichem gebet/zu solch-

em trost vnd trotzkomen/Denn ich hab droben ge-

sagt/weil Dentsch land so vol bosheit vñ lesterung

ist/das zu hoch vber macht ist/vnd yn hymel schrey-

et/kans nicht anders werden/wo wir vns nicht bes-

fern vnd ablassen von verfolgung vnd lesterung des

Euangelij/wir müssen herhalten vnd eine stanpelei-

den/Wo es der Türcke nicht thut/so mus doch et-

was anders thun/Es were denn/das der iüngst tag

selbs keme/Es kome aber stanpe odder iüngster tag/

Wer Christen ist/vnd sich gebessert hat/der kans er-

leiden vnd wird selig/Die andern müssen gestrafft

vnd verloren werden/Von diesem stücke/das man

sich bessern vnd beten solle/habe ich gnugsam ge-

schrieben ynn ihenem büchlin vom Türcken kriege/

das nicht not widerumb hie zu erholen.

Das

Das sey gnug vom ersten teil dieser predigt/
nemlich/die gewissen zu vnterrichten vnd trösten/
Nu wollen wir das ander für vns nemen/Auch die
faust zu vermanen/das ist/das man leib vnd gut
dran wagen vnd williglich dran strecken solle/Vnd
wo die oberkeit zu diesem streit/schatzung foddert/
das man die selbigen gebe/wie man schuldig ist/zun
Römern am dreyzehenden. Desselbigen gleichen/
wo sie die person odder leib foddert/sol man auch zu
lauffen/denn da hat Got gehorsam geboten/Denn
vnsrer Jungkern vom Adel/haben bis her gnug ge-
brasset/geschlemmet/gerennet/gestoltzirt/gebran-
get/mit alzu vberflüssiger kost vnd kleidung/das
durch sie/alles gellt aus Dentschem lande geschut/
vnd sich(on was der sunden widder Gott ist) an
leib vnd gut verderbet/Es ist zeit/das sie auch yhren
stand vnd ampt beweisen/vnd ein mal/mit ernst se-
hen lassen/das sie vom adel sind. Desselbigen glei-
chen auch die bürger vnd kauff leut/mit vbermessi-
gem schmuck vnd vnzelichem wucher vnd geitz/lanz
ge gnug yhre lust gebüffet/Daben sie so viel hun-
dert tausent gülden so lange verkleidet/verthan od-
der versamlet/sollen sie auch ein mal/eine busse da-
von geben/vmb yhrer hoffart willen/dazu sie bis
her/so guten stillen fride gehabt/vnd des misse-
braucht.

Also auch der handwercks vnd baur's man/hab-
ben so lange her mit vbersetzen/schinden/stelen vnd
rauben/neben andern grossen mitwillen vnd vnge-
horsam/eine redlich busse wol verdienet/sonderlich
sint der zeit das Euangelion an tag ist komen / da
durch

*Poster-
or pars*

E

durch

durch sie frey vnd reich geworden/von allen schin-
dern vnd bettlern erlöst/das sie meinen/sie dürffen
Gott nicht mehr geben/noch allen seinen dienern/
sondern allein zu sich scharren vnd reißen/auff dem
marckt durch vbersetzen/gleich als aus dem bentel/
stelen/Dazu sie bisher grossen fried gehabt/gesof-
fen/getantz vnd gesungen haben ynn aller sicher-
heit/Wolan/was sie ersparet/gestolen vnd gesam-
let haben/was sie yhren Predigern vnd Pfarhern
entzogen/das sollen sie bruder Deiten den lands-
knechten zu sammen bracht haben/vnd keinen danck
dazu haben/Die Fürsten sollens on alle barmher-
zigkeit von yhn nemen/vnd kriegs volck damit hal-
ten/Quod non tollit Christus/tollit fiscus/So
sol es gehen/Wastu nicht wöllen einen gülden
geben zum frieden/Gotte zu liebe vnd dienst/so gib
nu zehen odder zwentzig/zum streit/Gotte zur straffe
vnd busse/Daben wir guts empfangen von dem
Herrn (spricht Hiob) warumb wöllen wir das
böse auch nicht leiden?

Es hat ein iglichs thun seine zeit / Spricht
Salomon Ecclesiastes am ersten / Bis her ist fr-
dens zeit gewesen/nu ist streitens zeit/Bis her/bras-
sens vnd brangens zeit/Nu aber sorgens vnd erbei-
tens zeit / Bis her/wucherns/stelens/scharrens
zeit/Nu aber ausgebens/bezalens/vnd aus stre-
uens zeit/Bis her/essens/trinckens/tantzens/freuz-
den/lachens zeit/Nu aber traurens/schreckens/
fürchtens/weinens zeit/Bis her/ringens/schlaf-
fens/müssig gehens/sicher lebens zeit / Nu aber
wachens

wachens/vnrüge/schaffens/werens zeit/Daben
wir ihene gute zeit kund gerne haben/vnd dennoch
Gotte nichts dafür dancken noch erkennen/So last
vns nu diese böse zeit auch dulden/vnd dran lernen/
für ihene gute zeit dancken/Ja/Wenn Gott ymer
gute zeit gebe/vnd ließe vns drinnen mit aller bos-
heit vnd mutwillen die erden füllen bis an den hy-
mel hinan/vnd hies vns dazu lieben Juncfern/das
möchten wir leiden/vnd sind also der guten tage
vnd fridens ynn aller büberey gewonet/Nu wills
vns faul thun/das auch böse zeit vñ vnfride kömpt/
Vnd wollen scheel vnd saur sehen/schatzung zu ge-
ben odder selbes zu reisen/Ja man müsts vns be-
stellen/Warumb hastu zuor nicht gehorcht/da
man dir Gottes wort sagt/So höre nu den teuffel
ym Türcken/der du Gott nicht hören woltest ynn
Christo. *A. B. 2.*

B. Sperrestu dich aber vnd wilt nicht geben noch
reisen/Wolan/so wird dichs der Türcke wol ler-
nen/Wenn er yns land kömpt/vnd thut dir wie er
itz vor Wien gethan hat/Nemlich/das er keine
schatzung noch reise von dir fordert/sondern steckt
dir haus vnd hoff an/nympt dir vihe vnd futter/
gellt vnd gut/sticht dich zu tod (wo dirs noch so gut
wird) schendet odder würget dir dein weib vnd töch-
ter für deinen augen/zuhacket deine kinder vñ spießet
sie auff deine zaunstecken/Vnd must dazu/das das
ergeste ist/solchs alles leiden vnd sehen/mit bösem
verzagtem gewissen/als ein verdampfer vnchrist/
der Gott vnd seiner oberkeit vngheorsam gewest ist/
oddere füret dich sampt yhn weg ynn die Türckey/
L ij verkuuffte

*Wylke et
Conf. Mathel.
von Luth.
Historie 12a-
gina 64. b.
et Saur in
Calend. Histo-
riarum.*

verkauft dich daselbs wie einen hund/das du dein
leben lang must umb ein stück brods vnd trunck wa-
ssers dienen ynn stettiger arbeit tag vnd nacht/mit
ruten vnd knüttlen getrieben/vnd dennoch keinen
lohn noch danck verdienen/Vnd wo ein sturm sol
geschehen/mustu der verloren hauffe sein/vnd alle
arbeit ym heer thun/Ober das kein Euangelion hö-
ren/Nichts von Christo vnd deiner seelen seligkeit
lernen/Als denn würdestu gern von zweu kien eine
zur schetzung geben/Gerne würdestu selbs die helfft
deiner gütter auch anbieten/gerne selbst vnter dei-
nem Fürsten reisen/gerne einen Prediger selbs er-
neren/der dir ym iar vier mal predigte/vnd wird als
les umb sonst sein/Sihe/das wiltu haben/darnach
ringestu itzt/Denn der Türcke ist der man/der dich
lernen wird/was du itzt für gute zeit hast/vnd wie
iemerlich/vndanckbarlich/hösllich/du sie widder
Gott/seine diener/vnd deinen nehisten zubracht/
versenmet vnd missebraucht hast/Der Türcke weis
den Adel zu mustern vnd zu demütigen/die bürger zu
züchtigen vnd gehorsam zu machen/die bauru zu ze-
men vnd den mutwillen zu büffen/Darumb/dencke
vnd sey frum/vnd bitte Gott/das der Türcke nicht
dein schulmeister werde/das rat ich dir/Er hats vor
Wien alzu grewlich beweiset/wie ein wüster vnsau-
ber zuchtmeister er sey.

Ich wolt wündschen (wo vns vnser sünde für
Got so viel wütze vñ mut lieffen) das alle Dendchen
so gesinnet weren / das sich kein flecklin noch dörff-
lin plundern noch weg führen lieffen vom Türcken/
Sonz

Sondern wenns zu solchem ernst vnd not keme/das
sich werete was sich weren kund/innung vnd alt/man
vnd weib/knecht vnd magd/bis das sie alle erwür-
get würden/dazu selbs haus vnd hoff abbrenneten
vnd alles verderbeten/das die Türcken nichts fün-
den/denn Junge kindlin/welche sie doch on das
spießten vnd zu hacken/wenn sie vns lebendig weg-
füren/vnd wir den selbigen doch nicht helffen kön-
nen/Vnd das solchs geschehe mit vorgehendem ge-
bet zu Gott/darynn sie alles seiner gnaden befolhen/
vnd als ym gehorsam der oberkeit/wie droben ge-
sagt. Es were yhe besser/das man den Türcken ein
leer land liesse/denn ein volles/Vnd wer weis/was
solche thurst schaffen würde bey den Türcken:Wer-
den wir weg gefurt/so haben wirs viel erger/denn
so wir erwürget werden/wie droben gehöret/Vnd
ist grosse fahr/das wir ynn der Türckey vom Christ-
lichen glauben / zum Türckischen glauben fallen
würden/zum teuffel ynn die helle hinein.

Schreiben doch die Römer selbs / von der
Dendschen weiber/das sie vorzeiten eben so wol als
die menner zu felde gezogen vnd gestritten haben/
Vnd welche magd odder iungfraw nicht hat einen
feind erwürget / hat zur straffe müssen iungfraw
bleiben/So schreiben die newen historien von den
Türcken/da sie zu Lemno ynn Griechen land sind
eingefallen / vnd den thorhüter erstochen / hat die
tochter des thorhüters/da sie den vater tod gesehen/
seine were genommen/vnd den Türcken ym thor/so
lange geweret/bis die burger dazu komen sind/vnd

Es ist

*Bella pu-
ella bellico-
so animo Tur-
cam re-
pellit.*

die

die Türcken vertrieben haben/Thun doch die Türcken selbs auch also/das sie sich ehe vnd lieber erwürgen/der fangen/lassen/Vnd nemen keine gefangene widder an/ob sie gleich gerne widder heim wolten.

Denn ich achte kein henslin so geringe / wo man sich drans weren wolte/die feinde müsten har drüber lassen/Doch solchs alles wissen die kriegsleute besser denn ich / der ich mich auff solch gelegenheit vnd leuffte nichts verstehe/Sondern danon rede ich/weil es doch ynn solchem fall mus gewagt sein/Vnd keiner gnaden bey dem Türcken zu hoffen ist/wenn er vns weg füret/sondern alles vnglück/hon vnd spot leiden müssen leiblich/dazu ynn geistlicher ferlichkeit der seelen/des worts beraubt sein/vnd yhr ergerlich Mahometisch leben sehen müssen/so decht ich/es were das beste/Gott sich befelhen/Vnd aus gethaner pflicht vnd gehorsam der oberkeit/sich weren so lange vnd mit wasser weise/man ymer künde/vnd sich nicht fangen lassen / sondern würgen/schiessen vnd stechen ynn die Türcken/bis wir da legen/Denn das du vmb der iungen kindlin willen gedechtest/dein leben zu behalten/ist nichts/Weil du gehöret hast/das die Türcken/solche kindlin/vnd was sie nicht mit führen mügen/alles erstechen/zu hacken vnd spießen/das du doch yhn widder helfen noch retten kanst/sondern allein grössern iamer vnd elend dran sehen must.

Vnd ob sie gleich die kindlin mit dir weg füren/so darffestu nicht hoffen / das sie die selbigen lassen bey dir bleiben/da wird nicht aus/Man verheufft ynn der Türckey die gefangene Christen/wie
das

das viehe/ vnd wie die sew / achtet nicht / Wer hie
vater/mutter/ kind odder weib sey / Da wird das
weib dorthin/der man hieher verkauft/ Also gehets
auch mit elltern vnd kindern zu/ das keins bey dem
andern gelassen wird/ wie die kensser vnd verkensser
wollen/ Das doch allenthalben besser were/ dabey
men ym hause/ sich weren vnd erwürgen lassen ynn
Gottes willen vnd der oberkeit gehorsam/ denn sich
ynn solch ferlich/ schendlich gefengnis geben. Das //
ist mein guter wunsch / Aber ich halt/ es wil //
wol ein wunsch bleiben / Denn ich solchs sage/
meinen lieben Christlichen Deudschen zu gut/ so da
gerne wollen vnterricht sein/ Die andern bedürffen
nichts / haben selbst gut diinckel sack vnd fas vol/
Aber wollen wir mit dem Türcken streiten vnd vns
weren/ so werden wir müssen andere vnd new ge- //
danken fassen/ vnd vns anders schicken vnd geweh- //
nen/ beide mit hertz vnd hand/ denn wir bisher ge-
wohnet sind.

Wie bey mus ich auch eine vermanung thun/
vnd einen trost geben den Deudschen/ so bereit ynn
der Türckey gefangen sind / odder noch gefangen
möchten werden/ gleich dem exempel nach des heili-
gen propheten Jeremia/ welcher auch einen brieff
schreib gen Babylonien/ vñ vermanet seine gefange-
ne Jüden/ das sie solten gedultig sein ym gefengnis
vñ ym glauben feste bleiben/ bis auff die zeit yhrer er-
lösung/ das sie sich nicht ergern solten an der Baby-
lonier glauben vnd Gottes dienst/ welcher gros war
vnd treflichen schein hatte/ das gar viel Jüden da-
hin fielen/ wie ich denn höre vnd lese/ das auch die
Christen

Christen seer abfallen vnd des Türcken odder
Mahomeths glauben williglich vnd vngewun-
gen an nemen/vmb des grossen scheins willen/den
sie haben ynn yhrem glauben/Darumb merck auff
mein lieber bruder/las dich warnen vnd vermanen/
das du ia ym rechten Christen glauben bleibest/vnd
deinen lieben Herrn vnd heiland Ihesum Chri-
stum/der fur deine sünde gestorben ist/nicht verleug-
nest noch vergessest.

11 So lerne nu/weil du noch rauh vnd stat hast/
die zehen gebot/dein vater vnser / den glauben / vnd
lerne sie wol/sonderlich diesen artickel da wir sagen/
Vnd an Ihesum Christ seinen einigen Son vnsern
Herrn / der empfangen ist vom heiligen geist / ge-
born von der iungfrawen Maria/gelitten hat vnter
Pontio Pilato / gecreutzigt / gestorben vnd begra-
ben/Nidder gefaren zur hellen/Am dritten tag auff
erstanden von den todten / auffgefaren gen hymel/
sitzend zur rechten Gottes des allmechtigen Vaters/
von dannen er komen wird zu richten die lebendigen
vnd die todten &c. Denn an diesem artickel ligts/von
diesem artickel/heissen wir Christen/vnd sind auch
auff den selbigen / durchs Euangelion beruffen/
getaufft/vnd ynn die Christenheit gezelet vnd ange-
nomen/vnd empfangen durch den selbigen / den hei-
ligen geist/vnd vergebung der sünden/dazu die auff-
erstehung von den todten vnd das ewige leben /
Denn dieser artickel macht vns zu Gottes kinder
vnd Christus bruder/das wir yhm ewiglich gleich
vnd mit erben werden.

Vnd

Vnd durch diesen artickel wird vnser glaube ge-
sondert / von allen andern glauben auff erden /
Denn die Jüden haben des nicht / Die Türcken vnd
Sarracener auch nicht / dazu kein Papist noch fal-
scher Christ / noch kein ander vnglenbiger / sondern
allein die rechten Christen. Darumb / wo du ynn die
Türckey komest / da du keine prediger noch bücher
haben kanst / da erzele bey dir selbs / es sey ym bette
odder ynn der arbeit / es sey mit worten odder ge-
dancken / dein Vater vnser / den Glauben / vnd die
Zehen gebot / vnd wenn du auff diesen artickel
kämpst / so drucke mit dem daumen auff einen fin-
ger odder gib dir sonst etwa ein zeichen mit der hand
odder fuß / auff das du diesen artickel / dir wol ein-
bildest vnd mercklich macheest / Vnd sonderlich / wo
du etwa wirst ein Türckisch ergernis sehen odder
anfechtung haben / Vnd bitte mit dem Vater vnser /
das dich Gott behüte für ergernis / vnd behalte dich
rein vnd feste ynn diesem artickel / Denn an dem ar-
tickel / ligt dein leben vnd seligkeit. Eben so verma-
net S. Jeremias seine Jüden auch zu Babylonien /
wenn sie die gällden vnd sylbern götzen sehen wür-
den / solten sie an yhren Gott zu Jerusalem gedens-
cken / vnd bey sich sprechen / Derr dich allein sol man
anbeten &c. Also thu hic auch / Wo du bey den Tür-
cken wirst etwa sehen / einen grossen schein der hei-
ligkeit / so las dichs nicht bewegen / sondern sprich /
Vnd wenn du ein Engel werest / so bistu dennoch
nicht Ihesus Christus / Derr Ihesu an dich glaube
ich alleine / hilff mir &c.

Vnter andern ergernissen bey den Türcken / ist

das

§

das wol das fürnemeste / Das yhre priester odder
geistlichen / solch ein ernst / dapffer / strenge leben für
ren / das man sie möcht für Engel vnd nicht für
menschen ansehen / das mit allen vnsern geistlichen
vnd mōnchen ym Bapstum ein schertz ist gegen sie /
Offt werden sie auch entzücket / auch vber tisch bey
den leuten / das sie sitzen als weren sie tod / Thun
auch zu weilen grosse wunderzeichen dazu / Wen solt
nu solchs nicht ergern vñ bewegen ? Du aber / wenn
dir solche für komen / So wisse vnd gedencke / das sie
dennoch nichts von deinem artickel odder von dei-
nem Herrn Ihesu Christo wissen noch halten /
Darumb so mus es falsch sein / Denn der teuffel
kan auch ernst sein / saur sehen / viel fasten / falsche
wunder thun / vnd die seinen entzücken / Aber Ihe-
sum Christum mag er nicht leiden noch hören /
Darumb so wisse / das solche Türkische heiligen /
des teuffels heiligen sind / die durch yhre eigen grosse
wercke / wollen frum vnd selig werden / vnd andern
helffen / on vnd außser dem einigen heilande Ihesu
Christo / vnd verführen also beide sich selbs vnd alle
andere / die diesen artickel von Ihesu Christo nicht
wissen odder nicht achten / aller dinge / wie vns vnser
Mōnche haben wollen zum hymel helffen mit yhrer
eigen heiligkeit.

Zum andern / wirstu auch finden / das sie ynn
yhren kirchen oft zum gebet zu samen komen / vnd
mit solcher zucht / stille / vnd schönen eusserlichen ge-
berden / beten / das bey vns ynn vnsern kirchen / sol-
che zucht vnd stille auch nirgent zu finden ist / Denn
da sind die weiber an sonderlichem ort / vnd so ver-
hüllet /

hüllet/das man keine kan ansehen/das auch vnser
gefangen brüder ynn der Türckey klagen vber vnser
volck/das nicht auch ynn vnsern kirchen/so still/or-
denlich vnd geistlich sich zieret vnd stellet/Sihe/das
möcht aber mal ein solchen gedanken geben ynn
dein hertz vnd sagen/Für war/So fein halten vnd
stellen sich die Christen nicht ynn yhren kirchen zc.
Da drücke aber mal mit dem daumen auff einen
finger/vnd dencke an Ihesum Christum/den sie ni-
cht haben noch achten/Denn las sich zieren/stellen/
geberden/wer do wil vnd wie er wil/glenbt er nicht
an Ihesu Christ/so bistu gewis/das Gott lieber
hat/Es sen vnd trincken ym glauben/denn fasten on
glauben/lieber wenig ordenlich geberde ym glau-
ben/denn viel schöner geberd on glauben/lieber we-
nig gebet ym glauben/denn viel gebet on glauben/
Christus vrtheilet doch/ym Euangelio Luce am sie-
benden/das die arme sunderin frümer were mit we-
nigen geberden/denn Simon der aufsetzige mit al-
lem seinem geprenge/Vnd der arme sunder der Zöl-
ner/musste besser sein/on fasten vnd feyren/denn der
homütige Phariseer mit seinem fasten vnd aller hei-
ligkeit/Vnd sprach dazu widder die hübschen vnd
glaubigen phariseer alle/Darn vnd Zölner werden
ehe gen hymel komen denn yhr.

*Im Glau-
ben
an Ihesu Christum*

Zum dritten/wirstu auch walfarten zu den
Türkischen heiligen daselbst finden/die doch nicht
ym Christen glauben/sondern ym Mahomets glau-
ben gestorben sind/wie sie bekennen vnd rhumen/
Da geloben sich die Türcken hin/lauffen vnd ruffen

§ ij sie

ſie an/aller maſſen/wie wir zu vnſern Walfarten ge
lauffen ſind/vnd vnſer heiligen angeruffen haben/
Es wird auch vielen geholffen/vnd geſchehen viel
groſſer zeichen/gleich wie bey vns auch geſchehen
iſt/Von ſolchen falſchen wunderzeichen/haben wir
offt vnd viel geſchrieben/die bey vns/von den heili-
gen (als wir gemeinet) vnd bey den Walfarten ge-
ſchehen/das auch etliche todten auſſerweckt/blin-
den ſehend/lamen gehend / worden ſind / vnd der
gleichen/wie denn Chriſtus/verkündigt hat Mat-
thei am vier vnd zwentzigſten/das die falſche Chri-
ſti vnd falſche propheten ſolche wunder thun ſolten/
das auch die auſſerweleten möchten verführet wer-
den/Des gleichen S. Paulus ynn der andern Epi-
ſteln zun Theſſalonicern am vierden/auch verkün-
digt/Denn das iſt dem teuffel ein geringes/einen
menſchen zu plagen/das er vnd yederman nicht an-
ders wehnet/denn er ſey blind/lam/tod/Darnach/
wenn er damit hat ſeine abgötterey angericht/vnd
die leute von Chriſto/etwa zum heiligen (das iſt ſich
ſelbs) anzuruffen getrieben/als denn ablaſſe zu pla-
gen/das der menſch gleube/Sein heilige habe yhn
geholffen/Er kan auch wol ſo viel kunſt/das er zu
weilen rechte krankheit vertreiben vnd rechte ſche-
den heilen kan/Denn er iſt ein Doctor vber alle doc-
tor ynn der ertzney/dazu ein Fürſt der welt/Sihe/
was wunder thut er bey vnd durch ſeine zeuberer/
wie ſeltzam er yhn hilfft/vnbegreifliche ding zu
thun.

Was thet er dem heiligen Man Iob/welch
ein wetter vnd donner macht er ynn der luſt/vnd
ver-

verbrand yhm alle sein gut/vnd tödtet yhm seine
kinder/dazu schlug er yhm seinen eigen leib/mit
grewlichen bösen blatern vnd schweren/Sihe/wie
er vnsern Herrn Christum selbs ynn den lufften für-
rete auff den tempel/vnd vom tempel auff den ho-
hen berg(als were er sein Gott)vnd zeigtet yhm alle
reiche auff erden/ynn einem augenblick/Kan er nu
wetter machen/blattern schaffen/ynn lufften für-
ren/vnd also mit den heiligen spielen/dazu mit Chri-
sto selbs/was solt er nicht vermügen mit seinen got-
losen vnd vnchristen? Darumb sey gewarnet/
Wenn du ynn der Türckey zeichen sehen odder hö-
ren würdest/das du gedencdest bey dir selbs/vnd
sprechest/Vnd wenn du alle todten auff wecktest/
vnd alle zeichen thettest/weil du da neben Ihesum
Christum verlengnest vnd lesterst odder nicht ken-
nen wilt/so gleybe dir der teuffel an meiner stat/ich
wil lieber on zeichen vnd wunder bey meinem schwa-
chen Christo bleiben/denn zu dir starcken vnd mech-
tigen wundertheter fallen.

Vnd ist zwar ynn der Türckey das vorteil/das
man solche falsche wunder leichtlich kennen vnd
sich dafür hüten kan/weil die selbigen nicht ynn
Christus namen geschehen/sondern widder Chri-
stus namen/ynn des Mahomets namen/Denn wie
gesagt/Sie halten nichts von Christo/spotten vnd
lestern viel mehr die Christen mit dem namen Chri-
sti/als mit eines vntüchtigen heiligen namen/der
die seinen verlesst vnd yhm nicht hilfft widder den
Mahometh/Aber bey vns vnter dem Papstum/
G sind

sind solche falsche zeichen viel ferlicher/vnd schwerer zu erkennen/weil sie bey vns / als bey den Christen/vnd vnter dem namen Christi/als von seinen Christlichen heiligen / geschehen / Da hat er sein recht teuffels spiel / vnter dem namen Christi / die leute von Christo zu füren auff's aller geschwindest vnd behendest / wie Christus spricht / das solche falsche Christi/möchten auch die außserweleten verführen.

Zum vierden / wirstu sehen/bey den Türcken/nach dem eusserlichen wandel/ein dafffer/strenge vnd ehrbarlich wesen/Sie trincken nicht wein/sauffen vnd fressen nicht so/wie wir thun/kleiden sich nicht so leichtfertiglich vnd köstlich / bawen nicht so prechtig/brangen auch nicht so / schweren vnd fluchen nicht so / haben grossen trefflichen gehorsam/zucht vnd ehre gegen yhren Keiser vnd herrn/ Vnd haben yhr regiment/eusserlich gefasset vnd ym schwanc/wie wirs gerne haben wolten ynn Dendschen landen/Vnd wie wol yhr gesetzte zu lesst/das einer mag zwelff ehe weiber haben/vnd dazu Wedde odder beyschlefferin/wie viel er wil/vnd dennoch aller kinder gleich erben sind / So halten sie doch solche weyber alle ynn grossen zwang vnd gehorsam/das auch der man für den lerten selten mit seiner weib einem redet odder leichtfertiglich bey yhr sitzt odder schertzt/Denn ob wol der man yhm solche weiber lesst vertrauen durch die priester/so behest er doch das recht vnd die macht/von sich zu lassen welche er wil/nach dem sie verdienet odder er sie lieb hat odder gram wird / Die mit zwingen sie yhre

yhre weiber gewaltiglich/ Vnd wie wol solche ehe/
nicht ein ehe für Gott/sondern mehr ein schein ist/
denn eine ehe/noch halten sie damit yhre weiber ynn
solchem zwang vnd schönen geberden/das bey yhn
nicht solch/fürwitz/vppikeit/leichtfertigkeit/vnd
ander vberschlüssiger/schmuck/kost vnd bracht vnter
den weibern ist/als bey vns.

Nu ist solcher schein auch wol so ein gros er-
gernis eym vnberichten vnd schwachen Christen als
kein gülden bilde zu Babylon den Jüden gewesen ist/
vnd kein Kartheuser kloster bey vns ist/weil bey vns
kein orden so heilig ist/der nicht wein trincke/Vnd
kein weib noch Jungfraw der massen ym zaum le-
ben mus. Darumb sihe dich für/vnd drücke aber
mal den finger mit dem daumen/Denn du findest
auch ynn diesem stücke deinen Christum nicht/
Was hilft denn solch schön ding/so es ausser
vnd widder Christum ist? Da magst du wol sa-
gen/das sprich wort/Es ist schön böse/Aber bey
vns ist/Aber feste/Denn es ist ia besser ynn
Christo messig wein trincken/vnd frölich sein/
Denn ausser Christo/solch trefflich saur ding
für geben/das widder Propheten noch Apostel/
noch Christus selbs hat für gegeben/Denn Chri-
stus ass vnd tranck/beyde mit man vnd weibern/
beyde mit Phariseern vnd Jölnern/Aber die Tür-
cken müßens höher vnd besser machen/denn Gott
vnd sein eigen Son selbs machen/welchen sie doch
die weil lestern vnd verfolgen/wie vnser geist-
lichen vnd Gleissner bey vns auch thun/
G ij So

So wisse nu / das Christus reich stehet nicht ynn
essen odder trincken / auch nicht ynn eusserlichen ges
berden / sondern ym glauben des hertzen / Luce am
siebenzehenden ꝛc. vnd las dich solch gleissen nichts
anfechten.

Über diese ergernis / schlegt nu das grosse glück
zu / das die Türcken so mechtig worden sind / so viel
sieg haben / die Christen (wie sie meinen) so oft dar
nider gelegt haben / vnd bisher / so trefflich zu ge
nomen / das es keine vernunft anders deuten mag /
denn das yhr heiligkeit solchs verdiene / vnd yhr
glaube vnd wesen Gotte so wol gefalle / Darüber sie
so starrig / hart vnd verstockt werden / das man mei
net / es sey vnmüglich einen Türcken zu bekeren /
Widderumb halten sie / das kein erger volck sey / denn
die Christen / vnd kein schendlicher glaube / denn der
Christliche glaube / Vnd fallen daher ynn solchen
vberschwenglichen hohmut zu lestern vnd zu schen
den Christum vnd seine Christen / das sie vnter
einander rühmen / spotten vnd sagen / Die Christen
sind Weiber / Aber die Türcken sind yhre Menner /
als weren sie allein eitel Velden vnd Risen / Vnd wir
Christen eitel weiber vnd memmen / Wissen aber
nicht / wie saur es wird mit yhn ausgehen / Die stol
zen Babylonier / waren auch menner / vnd die Jü
den musten weiber sein / Aber die selbigen weiber /
blieben zu letzt beide man vnd herr / da die Babylo
nier widder hant noch har behielten.

Sihe vnter diesem heiligen schein der Türcken /
ligen verborgen / ia vnuerborgen / so viel vngeworner
schrecklicher gewel / nemlich / das sie Christum
nicht.

nicht allein leugnen/sondern auch lestern vnd schen-
den/mit seym blut/sterben/aufferstehen vnd mit al-
lem gut/das er der wellt gethan hat/vnd setzen yhs
ren Mahometh vber yhn/damit sie auch Gott den
Vater lestern/vnd den teuffel an Gottes stat ehren/
Darnach auch solch bluthunde sind/so gewulich
viel blut vergiessen vnd mord begehen/ynn so viel
lenden/als nie auff erden gehöret ist/Dazu solch
Welsch vnd Sodomisch vnkeuscheit treiben/das
nicht zu sagen ist für züchtigen leuten/on was das
ist/das sie die ehe so gar nichts achten/Sind dazu
die aller grösssten reuber vnd verderber aller land
vnd leute/Vnd wer wil alle solche gewel erzelen/
der sie doch keine für sunde halten/sondern alles für
eitel tugent/Das heisst blindheit vber alle blind-
heit/Vnd wird solchs alles mit dem eusserlichen
schein(wie gesagt) also geschmückt/das viel Chri-
sten abfallen vnd zu yhrem glauben/vnd zu solchem
gewulichen beslichem schönen teuffel/williglich
sich geben/Vnd zwar/wo solche falsche heiligkeit
ist/da müssen alle laster auff eyem hauffen sein/wie
wir wol sehen an vnsern geistlichen/das yhr lestern/
hohmut/mord/geitz/vnzucht vnd aller laster kein
mas ist.

Sie trösten sich aber mit diesem spruch/ Ey
meinstu das Gott so viel leute/so lange solt yrren
vnd verdamnen lassen/wie sich vnser Endechrist
auch tröstet/Welcher spruch odder gedanken/anch
wol kan einen bawfelligen Christen stossen/vnd ei-
nen halstarrigen buben stercken/gleich wie sich die
Juden vorzeiten/anch damit setzten widder die hei-
G iij ligen

Dem wo du sonst ein rechter Christ bist / schadet
dir solcher dienst vnd elend nicht / Ja wo du sein
kannst Christlich vnd gedultig brauchen / ist dirs gut
vnd nütz / zur seligkeit / als dein creutz / darynn dein
glaube geübet vnd beweret wird / Gedencke an die
exempel aller heiligen / Sibe / wie der Ertzuater Ja-
cob / dem schalckhafftigen argen Laban seinem
schweher dienet vmb Rachel / vnd hielt yhm seinen
dienst trewlich aus / Genesis am dreissigsten Capitel /
Vnd darnach sein son Joseph / wie der selbige
seinem vater gestolen vnd verkaufft von seinen eigen
brüdern / ynn Egypten seinem heidnischen herrn so
trewlich dienet / vnd drüber ynn kercker kam / Aber zu
letzt herrlich heraus kam / vnd ein herr des landes
ward / Genesis am acht vnd dreyssigsten Capitel /
Item wie einen schweren dienst das gantz volck Is-
rael muste thun lange zeit dem könige Pharaon ynn
Egypten / Exodi am ersten Capitel / Vnd lieff doch
keiner aus seinem dienst / wie vnslachtig odder
heidnisch vnd böse yhre herrn waren.

Item hernach / war das nicht ein schwerer
dienst / da das königreich Israel / gen Assyrien / vnd
hernach / das königreich Juda gen Babylonien ge-
füret ward / da musten / König / Königin / Fürsten /
Priester / Propheten / vnd viel heiliger leute / denn du
bist / dienen / vnd knechte sein / wie Daniel vnd seine
gesellen (Danielis am ersten Capitel) vnter dem
grawnsamen könige / da sie viel ferligkeit leibs vnd
feelen / teglich warten vnd auch dulden musten / mit
aller schmach vnd spott / wie der hundert sieben vnd
dreyssigst

dreyßigste Psalm wol anzeiget / *Super flumina*
Babylonis &c. Da sind freylich auch vngedultige
Juden gewesen / die geheulet / geklagt / geslucht vnd
gemurret haben / etliche dazu vom Judenthum ge-
fallen vnd heiden worden sind / Aber es musste gleich
wol sein / Die frommen hatten gedult / lieffen nicht
weg / sondern dienetten mit aller trew vnd vlets / wie
Daniel vnd seine gesellen / vnd blieben ym rechten
glauben / Darumb wurden sie auch erhöht vnd
von Gott gnediglich vnd wunderlich erlöset.

Vnd das wir zum newen Testament komen /
Musst nicht Christus / die Juden vnd den heiden
Pilaton vnd Heroden mit sich machen lassen / was
sie wolten ? Musste nicht Paulus gefangen sein /
vnd fast alle Apostel / etlich ynn das elend verstoßen
vnd verbannet / als S. Johannes ynn pathmos /
Vnd hernach viel heiliger Werterer aus Rom vnd
andern stedten / von haus vnd hoff / von weib vnd
kind / ynn ferne wüste Insulen vertrieben / vnd da
selbst ynn stein brüchen vnd ander schwere arbeit /
wie die esel / erbeiten / Warumb woltestu es besser ha-
ben / denn dein Herr Christus selbs / mit allen sei-
nen heiligen ym alten vnd newen testament ? Der
iünger solt nicht besser haben / denn sein meister
(spricht Christus) Denn ist er rechtschaffen / wenn
es yhm gehet / wie seinem meister / Luce am sechsten.

Mit vnwillen vnd vngedult thust du nicht
mehr / denn das du deinen herrn / des knecht du wor-
den bist / ergerst vnd desto böser machest / Schendest
D dazu

227
dazu die lere vnd den namen Christi/als seyen die Christen solche böse/vntrewe/falsche leute/die nicht dienen/sondern entlauffen/vnd sich selbsts entwenden wollen/als die schelecke vnd diebe/vnd werden da durch ynn yhem glauben herter vnd verstockter/Widderumb/wo du trewlich vnd vleissig dienetest/würdestu das Euangelion vnd den namen Christi/schmücken vnd preisen/das dein herr/vnd villeicht viel ander/wie böse sie weren/sagen müsten/Wolan/Nu sind doch die Christen/eintrew/gehorsam/frum/demütig/vleissig volck/Vnd würdest dazu der Türcken glauben damit zu schanden machen/vnd villeicht viel bekeren/wenn sie sehen würden/das die Christen/mit demut/gedult/vleis/trew/vnd der gleichen tugenden/die Türcken so weit vbertreffen/Das meint S. Paulus/da er Titum am dritten Capitel spricht/Die knecht sollen die lere vnser Herrn schmücken odder zieren ynn allen dingen.

Denn wie böse kans denn sein/einem Türcken odder heiden zu dienen? so fern du gleubig vnd ein Christ bist vnd bleibest/Mus doch hie bey vns mancher dienen/einem buben/tyrannen odder bösen herrn/Ja wie müssen wir thun vnter dem Papstum/da vnser tyrannen/vns fangen/zwingen/verziagen/treiben/brennen/köpffen/erseuffen/vnd erger mit vns handeln/den die Türcken mit dir thun/Noch müssen wir/weichen/dulden/leiden/dienen/helffen/raten/beten/heben vnd tragen/Welchs du alles mit vns wagen vnd warten müstest/wo du mit

mit vns woltest ein Christ sein vnd Christum be-
kennen/ Denn der Bapst ynn dem stück viel erger
ist/ denn der Türcke/ Der Türcke zwinget doch nie-
mant/ Christum zu verleugnen/ vnd seinem glau-
ben anhangen/ Vnd wenn er gleich auff's höchst
wütet/ mit leiblich morden an den Christen/ so thut
er damit nichts (so viel an yhm ist) denn das er den
hymel vol heiligen machet / Denn seine lesterung
widder Christum / vnd sein eusserlicher heiliger
schein/ zwingen nicht/ sondern versuchen vñ locken/
Aber der Bapst/ eben damit/ das er wil nicht feind
noch Türcke/ sondern der liebe Vater/ia der aller
heiligst vater vñ aller treweste hirte/ sein/ füllet er (so
viel an yhm ist) die helle mit eitel Christen/ Denn
er reisset die edlen seelen von Christo/ durch seine le-
sterliche menschen lere/ vnd füret sie auff eigen ge-
rechtigkeit/ welchs ist/ das recht geistlich morden/
vnd schier so gut/ als des Mahomets odder Tür-
cken lere vnd lesterung/ Wo man aber yhm solcher
hellischen teuflischen verführungen nicht wil ge-
statten/ nimpt er sich des Türcken weise auch an/
vnd mordet auch leiblich/ Vermöchte ers/ on zweif-
fel/ er solt wol grösser mord vnd blut vergiessen an-
richten/ denn der Türcke/ wie sie bis her wol bewei-
set haben/ mit so viel Kriegen/ hetzen vnd reitzen/ vn-
ter Keiser vnd Königen ꝛc.

Summa/ Wo wir hin komen/ da ist der rechte
wirt der teuffel da heym/ Komen wir zum Türcken/
so faren wir zum teuffel/ Bleiben wir vnter dem
Bapst/ so fallen wir ynn die helle/ Eitel teuffel auff

D ij beiden

*Pappa
crueli-
tate Tur-
cam supe-
rat.*

beiden seiten vnd allenthalben/ So stehet es leyder
itz ynn der welt/ vnd gehen die sprüche Christi vnd
S. Pauli ym vollem schwang/ das ynn den letzten
tagen/ sol ferliche vnd grausame zeit sein/ da der
teuffel los worden/ alle welt verführet/ vnd solch
iamer vnd not anricht/ das kein Mensch künd selig
werden/ wo Gott die selbigen tage nicht würde ver-
kürzen/ vmb seiner aufferweleten willen/ Es mus
also gehen zur letze/ das der teuffel die Christenheit/
mit aller macht/ auff allen seiten angreiffe/ beide
leiblich vnd geistlich/ vnd sein bestes vnd höhestes
an yhr versuche/ damit ein ende.

Darumb laßt vns wachen vnd wacker sein
ynn festem glauben an Christum/ Vnd ein iglicher
halt sich vnter seiner oberkeit/ gehorsam/ vnd warte
was Gott machen wird/ Vnd las gehen/ was da
gehet/ faren wie es feret/ Es ist doch hinfurt nichts
guts mehr zu hoffen/ Das töpffen ist zu brochen
vnd die suppen verschüt/ wir mügen die feherben
vollend hinach wagen/ vnd so viel es möglich ist/
guts muts dazu sein/ wie vns Christus leret vnd
spricht von dieser bösen zeit/ Luce am ein vnd zwenz-
zigsten Capitel/ Wenn yhr solchs sehet/ das ange-
het/ so sehet auff vnd richtet ewr heubt auff/ denn
ewr erlösung kömpt vnd ist nahe..

Doch das ich das nicht vergesse/ Wenn du vnt-
ter dem Türcken bist vnd dienen must/ wie gesagt
ist/ so solt du solchen dienst nicht weiter verstehen
noch deuten/ denn so fern es deinem haus herrn
nützet

nützet zu seinen gütern/Wenn er dich aber zwingen
wolt/widder die Christen zu streiten/da soltu nicht
gehorsam sein/sondern lieber alles leiden/was er
dir thun kan/ia viel lieber sterben/Denn du hörest
hie/das Daniel vom Türcken schreibt/Sein streit
sey widder die heiligen Gottes/die yhm nichts ge-
than haben/vnd vergessst eitel vnschuldig blut/
Da mustu dich für hüten/das du dich des nicht teil
hafftig machest/Gleich wie du seinem lesterlichen
abgott vnd Mahometh nicht must zufallen/ob du
gleich vnter yhm dienen must/Bleib doch der fru-
me Naaman/ym dritten buch der Könige am funff-
ten Capitel/ynn seines herrn königes dienst/vnd
bettet auch mit yhm ynn seinem tempel/Aber den-
noch bettet er seinen abgott nicht an/Vnd die lieben
heiligen Merterer S. Moritz vnd seine gesellen/da
sie der Keiser hies widder die Christen streiten/wol-
ten sie es nicht thun/worffen die waffen weg vnd
sprachen/Wenn er wolt widder die Christen strei-
ten/dürfft er keine ander suchen/sie weren selbs da
als Christen leute/bereit zu leiden was er wolte.

Eben also soltu deinen dienst den Türcken auch
leisten/das du damit nicht widder die Christen/
noch widder Gott strebest/sondern allein seinem
haus vnd gütern zum besten helffest/Solchs wil
ich auch gesagt vnd geraten haben allen den iheni-
gen/so vnter vnserm Keiser/Papst/Fürsten/leben/
das sie sich nicht gebrauchen lassen/widder das
Euangelion odder widder die Christen zu streiten/
odder sie zu verfolgen/Denn damit werden sie vn-

D iij schuldig

schuldig blut auff sich laden/vnd nichts besser sein/
denn die Türcken/Wan mus Gott mehr gehorsam
sein/denn den menschen/So hat Gott keinem her-
ren die oberkeit der massen gegeben/odder die leute
vnterworffen/das er damit solle widder Gott vnd
sein wort streben odder fechten/Vnd ist auch ynn
solchem fall/kein vnterthan seiner oberkeit/ein har-
breit/schuldig odder verwand/Ja es ist als denn
schon kein oberkeit mehr/wo solchs geschicht/Son-
dern die vnterthanen sind schuldig/der oberkeit leib-
lich zum besten zu dienen/das fride auff erden er-
halten werde/vnd dis leiblich leben müge desto sicher
sein vnd wol stehen.

Aber Gott der Vater aller gnaden vnd weis-
heit/wolle vns diese zeit gnediglich verkürzen/vnd
vns mit weisheit vnd stercke begaben vnd bereiten/
das wir die weil weislich vnd manhafftig wan-
deln/vnd der zukunfft vnser lieben Herrn Ihesu
Christi frölich warten/vnd von diesem iamertal se-
liglich scheiden mügen/Dem sey lob vnd danck/ehre
vnd preis ynn ewigkeit/AMEN.

Bedruckt zu Wittenberg durch
Nickel Schirlentz / Anno
MDXXIX.